



Broj: 01/5-50-1-5-27/09  
Sarajevo, 22.1.2009.godine

**Z A P I S N I K**  
**27. sjednice Komisije za saobraćaj i komunikacije,**  
**održane 22.1. 2009. godine**

Sjednica je održana 22.1.2009., s početkom u 10,20 sati.

Sjednici su prisustvovali članovi Komisije: Branko Dokić, Šemsudin Mehmedović, Slavko Matić, Husein Nanić, Selim Bešlagić i Mehmed Suljkanović.

Opravdano su odsustvovali Sadik Bahtić i Savo Erić.

Iz Ministarstva komunikacija i prometa BiH sjednici su prisustvovali: Marinko Šimunović i Dželal Hasečić, zamjenici generalnog direktora Direkcije za civilno zrakoplovstvo BiH, i Senaida Mehmedovski, stručni savjetnik u Sektoru za transport. Sjednici je prisustvovao i sekretar Komisije za saobraćaj i komunikacije Ahmed Jalovičić.

Sjednicom je predsjedavao Branko Dokić, predsjedavajući Komisije.

Za sjednicu je predložen sljedeći

**D N E V N I R E D**

1. Usvajanje Zapisnika 26. sjednice Komisije;
2. Prijedlog zakona o zrakoplovstvu BiH, predlagač: Vijeće ministara BiH (druga komisijska faza);
3. Prijedlog zakona o Agenciji za pružanje usluga u zračnoj plovidbi BiH, predlagač: Vijeće ministara BiH (druga komisijska faza);
4. Prijedlog zakona o dopuni Zakona o Javnom RTV sistemu BiH, predlagač: Vijeće ministara BiH (druga komisijska faza);
5. Prijedlog zakona o unutrašnjoj i pomorskoj plovidbi, predlagač: Vijeće ministara BiH (prva komisijska faza);
6. Izvještaj o radu Komisije za saobraćaj i komunikacije Predstavničkog doma u 2008.godini;
7. Orijentacioni radni plan Komisije za saobraćaj i komunikacije Predstavničkog doma za 2009.godinu;
8. Tekuća pitanja  
- Izvještaj s Radionice „Podrška parlamenata harmoniziranim reformama energetskog sektora“.

Dnevni red usvojen je jednoglasno.

### **Ad. 1. Usvajanje Zapisnika 26. sjednice Komisije**

Zapisnik 26. sjednice usvojen je jednoglasno, bez primjedbi.

### **Ad. 2. Prijedlog zakona o zrakoplovstvu BiH, predlagач: Vijeće ministara BiH (druga komisijska faza)**

### **Ad. 3. Prijedlog zakona o Agenciji za pružanje usluga u zračnoj plovidbi BiH, predlagач: Vijeće ministara BiH (druga komisijska faza)**

**Branko Dokić** podsjetio je da je na Prijedlog zakona o zrakoplovstvu Bosne i Hercegovine uloženo više amandmana i da su amandmani dostavljeni Ministarstvu komunikacija i prometa BiH (u daljnjem tekstu: Ministarstvo), te da Ministarstvo nije dostavilo pismeno izjašnjenje o amandmanima.

**Dželal Hasečić** ukazao je da je Direkcija za civilno zrakoplovstvo (u daljnjem tekstu: BHDCA) dostavila Ministarstvu komentare na predložene amandmane, ali mu nije poznato zašto ih Ministarstvo nije prosljedilo Komisiji za saobraćaj i komunikacije Predstavničkog doma (u daljnjem tekstu: Komisija).

**Šemsudin Mehmedović** smatra da je čudno da sjednici ne prisustvuju predstavnici Ministarstva, konstatirajući da u prijedlozima zakona ima određenih nedostataka, ali da zbog obaveza u Predstavničkom domu nije stigao uložiti amandmane. Predložio je da Komisija zatraži pismeno izjašnjenje Ministarstva o amandmanima, te da Komisija traži od Predstavničkog doma produženje amandmanske faze. Također je predložio da se od Ministarstva zatraži informacija o stanju u oblasti civilnog zrakoplovstva u BiH, kao i informacija o planiranim efektima provođenja Prijedloga zakona o zrakoplovstvu BiH i Prijedloga zakona o Agenciji za pružanje usluga u zračnoj plovidbi BiH.

**Mehmed Suljkanović** podržao je prijedlog Šemsudina Mehmedovića za produženje amandmanske faze, te ukazao na mogućnost postojanja divergentnih stavova Ministarstva i BHDCA u odnosu na prijedloge zakona.

**Selim Bešliagić** istakao je da je danas dobio dopis od stručnih lica koja se bave civilnim zrakoplovstvom, u kojem navode da postoje određene nejasnoće u prijedlozima zakona, te da će uložiti amandmane ukoliko se produži amandmanska faza za oba prijedloga zakona.

**Slavko Matić** smatra da treba podržati svaki prijedlog koji vodi do usvajanja ovih prijedloga zakona, a naročito uzimajući u obzir da će zakonskim reguliranjem ove oblasti biti ostvarena finansijska korist za Bosnu i Hercegovinu.

**Branko Dokić** istakao je da su za njega pridstavnici BHDCA zvanični predstavnici Ministarstva, ali da će zbog velikog broja amandmana podržati prijedlog za produženje amandmanske faze. Predlaže da se od Ministarstva zatraži informacija o planiranoj dinamici provođenja navedenih prijedloga zakona, kao i da ubuduće Ministarstvo u pismenoj formi obavijesti Komisiju ko će, u ime Ministarstva, prisustvovati sjednici Komisije.

Nakon rasprave, Komisija je usvojila sljedeće zaključke:

1. S obzirom da je zaključila da je potrebno da Ministarstvo komunikacija i prometa BiH dostavi Komisiji pismeno izjašnjenje o uložnim amandmanima (41), kao i da je potrebno izvršiti dodatne konsultacije u vezi s pojedinim odredbama prijedloga zakona, molimo da Predstavnički dom, u skladu s članom 111. stav (6) Poslovnika Predstavničkog doma, odobri produženje roka za dostavljanje izvještaja o Prijedlogu zakona o zrakoplovstvu BiH i Prijedlogu zakona o Agenciji za pružanje usluga u zračnoj plovidbi BiH do 10.2.2009.
2. Komisija za saobraćaj i komunikacije zaključila je da je potrebno produžiti amandmansku fazu o Prijedlogu zakona o zrakoplovstvu BiH i Prijedlogu zakona o Agenciji za pružanje usluga u

vazdušnoj plovidbi BiH do 10.02.2009., te je potrebno da Ministarstvo komunikacija i prometa BiH dostavi Komisiji pismeno izjašnjenje o uložnim amandmanima na ove prijedloge zakona, kao i informaciju o trenutnoj situaciji u oblasti civilnog zrakoplovstva BiH i planiranoj dinamici provođenja navedenih prijedloga zakona.

3. Traži se od Ministarstva komunikacija i prometa BiH da ubuduće pismeno obavijesti Komisiju za saobraćaj i komunikacije koji će predstavnici Ministarstva prisustvovati sjednici Komisije.

**Ad. 4. Prijedloga zakona o dopuni Zakona o Javnom RTV sistemu BiH,  
predlagač: Vijeće ministara BiH (druga komisijska faza)**

Kako sjednici nije prisustvovao predstavnik Vijeća ministara BiH, Komisija je, u skladu s članom 108. stav (2) Poslovnika Predstavničkog doma, jednoglasno odlučila da odgodi raspravu o ovoj tački dnevnog reda do sljedeće sjednice Komisije.

**Ad. 5. Prijedlog zakona o unutrašnjoj i pomorskoj plovidbi,  
predlagač: Vijeće ministara BiH (druga komisijska faza)**

**Branko Dokić** pozvao je predstavnika Ministarstva komunikacija i prometa BiH da da uvodnu riječ o Prijedlogu zakona o unutrašnjoj i pomorskoj plovidbi (u daljnjem tekstu: Prijedlog zakona).

**Senaida Mehmedovski** istakla je da je nakon dugotrajnog rada na Nacrtu zakona, Vijeće ministara BiH u decembru 2008. godinu usvojilo Prijedlog zakona. Bosna i Hercegovina kao pomorska zemlja mora imati propise kojima se uređuje plovidba na unutrašnjim i pomorskim plovnim putevima na kojima važi međunarodni režim plovidbe. Potreba donošenja ovog zakona ogleda se, prije svega, u potrebi zadovoljenja poraslih prometnih potreba i unapređenju sigurnog odvijanja plovidbe na unutrašnjim i pomorskim plovnim putevima. Naglasila je da unutrašnja plovidba u poređenju sa ostalim vidovima unutrašnjeg prometa ima privredne i ekološke prednosti.

**Branko Dokić** ukazao je da je Vlada Republika Srpske uputila dopis poslanicima iz Republike Srpske u kojem stoji da nisu saglasni s ovim prijedlogom zakona, jer nije usaglašen s entitetskim ministarstvima i da predlagač zakona nije uvažio primjedbe Ministarstva saobraćaja i veza Republike Srpske. Kako su prilikom usvajanja Prijedloga zakona na sjednici Vijeća ministara BiH preglasani ministri iz srpskog naroda, mišljenje je da bi bilo najbolje rješenje da, ako postoji mogućnost, Predstavnički dom vrati Prijedlog zakona na doradu Vijeću ministara BiH, kako bi se moglo izvršiti usaglašavanje s nadležnim entitetskim ministarstvima.

**Šemsudin Mehmedović** predlaže da se, pošto ne postoji poslovnička mogućnost da se Prijedlog zakona vrati na doradu, Komisija izjasni o principima Prijedloga zakona, a ako Prijedlog zakona dobije podršku Doma u prvom čitanju, treba nastojati amandmanima poboljšati tekst Prijedloga zakona.

U raspravi o ovoj tačku učestvovali su i: Mehmed Suljkanović, Selim Bešlagić, Slavko Matić i Husein Nanić.

Komisija je, s tri glasa “za”, dva “protiv” i jednim “suzdržanim”, podržala principe Prijedloga zakona o unutrašnjoj i pomorskoj plovidbi.

**Ad. 6. Izvještaj o radu Komisije za saobraćaj i komunikacije Predstavničkog doma u 2008. godini**

Komisija je jednoglasno usvojila Izvještaj o radu Komisije za saobraćaj i komunikacije Predstavničkog doma u 2008. godini.

#### **Ad. 7. Orijentacioni radni plan Komisije za saobraćaj i komunikacije Predstavničkog doma za 2009.godinu**

Komisija je jednoglasno usvojila Orijentacioni radni plan Komisije za saobraćaj i komunikacije Predstavničkog doma za 2009.godinu.

Komisija je zaključila da konačan Plan rada Komisije za 2009.godinu sačini nakon što dobije Plan rada Vijeća ministara BiH za 2009. godinu.

#### **Ad. 8. Tekuća pitanja**

##### **a) Izvještaj s Radionice „Podrška parlamenata harmoniziranim reformama energetskeg sektora“**

Komisija je jednoglasno usvojila Izvještaj s Radionice „Podrška parlamenata harmoniziranim reformama energetskeg sektora“.

Kako nije bilo drugih pitanja, predsjedavajući je zaključio sjednicu u 11,30 sati.

SEKRETAR KOMISIJE  
Ahmed Jalovičić

PREDSJEDAVAJUĆI KOMISIJE  
dr. Branko Dokić